

四庫全書

史部

欽定四庫全書

史部

釋史卷二十四之一

詳校官檢討臣羅國俊

編修臣裴謙覆勘

覆校官博士臣劉光第

校對官中書臣施光輅

謄錄監生臣王焜

欽定四庫全書

釋史卷二十四之一

靈壁縣知縣馬驥撰

周禮之制一

冠禮

儀禮士冠禮筮于廟門主人玄冠朝服緇帶素鞶即位  
于門東西面有司如主人服即位于西方東面北上筮  
與席所卦者具饌于西塾布席于門中闕西閭外西面  
筮人執筮抽上韝兼執之進受命於主人宰自右少退

贊命筮人許諾右還即席坐西面卦者在左牽筮書卦  
執以示主人主人受眊反之筮人還東面旅占牽進告  
吉若不吉則筮遠日如初儀徹筮席宗人告事畢

右筮日

主人戒賓賓禮辭許主人再拜賓答拜主人退賓拜  
送戒賓曰某有子某將加布于其首願吾子之教之也  
賓對曰某不敏恐不能共事以病吾子敢辭主人曰某  
猶願吾子之終教之也賓對曰吾子重有命某敢不從  
右戒賓

前期三日筮賓如求日之儀乃宿賓賓如主人

服出門左西面再拜主人東面答拜乃宿賓賓許主人  
再拜賓答拜主人退賓拜送宿贊冠者一人亦如之宿  
曰某將加布于某之首吾子將蒞之敢宿賓對曰某敢  
不夙興右宿賓厥明夕為期于廟門之外主人立于門

東兄弟在其南少退西面北上有司皆如宿服立于西

方東面北上擯者請期宰告曰質明行事告兄弟及有

司告事畢擯者告期于賓之家

右為期

夙興設洗直于

東榮南北以堂深水在洗東陳服于房中西墉下東領

北上爵弁服纁裳純衣緇帶韎韐皮弁服素積緇帶素  
韠玄端玄裳黃裳雜裳可也緇帶爵韠緇布冠缺項青  
組纓屬于缺緇纓廣終幅長六尺皮弁笄爵弁笄緇組  
紃纁邊同篚櫛實于簞蒲筵二在南側尊一甌醴在服  
北有篚實勺解角柶脯醢南上爵弁皮弁緇布冠各一  
匱執以待于西北南南面東上賓升則東面屨夏用葛  
玄端黑屨青絢纁純純博寸素積白屨以魁柎之緇絢  
纁純純博寸爵弁纁屨黑絢纁純純博寸冬皮屨可也

不屨總屨

右陳  
器服

主人立端爵韞立于阼階下直東序

西面兄弟畢衿立于洗東西面北上擯者立端負東  
塾將冠者采衣紒在房中南面賓如主人服贊者立端  
從之立于外門之外擯者告主人迎出門左西面再拜  
賓答拜主人揖贊者與賓揖先入每曲揖至于廟門揖  
入三揖至于階三讓主人升立于序端西面賓西序東  
面贊者盥于洗西升立于房中西面南上主人之贊者  
筵于東序少北西面將冠者出房南面贊者奠纚笄櫛

于筵南端賓揖將冠者將冠者即筵坐贊者坐櫛設纚  
賓降主人降賓辭主人對賓盥率壹揖壹讓升主人升  
復初位賓筵前坐正纚興降西階一等執冠者升一等  
東面授賓賓右手執項左手執前進容乃祝坐如初乃  
冠興復位贊者率冠者興賓揖之適房服玄端爵韠出  
房南面賓揖之即筵坐櫛設筭賓盥正纚如初降二等  
受皮弁右執項左執前進祝加之如初復位贊者率紘  
興賓揖之適房服素積素韠容出房南面賓降三等受



爵弁加之服纁裳黼黻其他如加皮弁之儀徹皮弁冠  
櫛筵入于房始加祝曰令月吉日始加元服棄爾幼志  
順爾成德壽考維祺介爾景福再加曰吉月令辰乃申  
爾服敬爾威儀淑慎爾德眉壽萬年永受胡福三加曰  
以歲之正以月之令咸加爾服兄弟具在以成厥德黃  
耆無疆受天之慶

右加冠

筵于户西南面贊者洗于房

中側酌醴加柶覆之面葉賓揖冠者就筵筵西南面賓  
受醴于户東加柶面枋筵前北面冠者筵西拜受觶賓

東面答拜薦脯醢冠者即筵坐左執觶右祭脯醢以柶  
祭醴三興筵末坐啐醴捷柶興降筵坐奠觶拜執觶興  
賓答拜醴辭曰甘醴惟厚嘉薦令芳拜受祭之以定爾  
祥承天之休壽考不忘

右醴冠者

冠者奠觶于薦東降筵

北面坐取脯降自西階適東壁北面見于母母拜受子  
拜送母又拜冠者母不在則使人受脯于西階下

右見母

若不醴則醢用酒尊于房戶之間兩甌有禁玄酒在  
西加勺南枋洗有篚在西南順始加醢用脯醢賓降取

爵于篚辭降如初卒洗升酌冠者拜受賓答拜如初冠者升筵坐左執爵右祭脯醢祭酒興筵末坐啐酒降筵拜賓答拜冠者奠爵于薦東立于筵西徹薦爵筵尊不徹加皮弁如初儀再醺攝酒其他皆如初加爵弁如初儀三醺有乾肉折俎齊之其他如初北面取脯見于母若殺則特豚載合升離肺實于鼎設扃鼎始醺如初再醺兩豆葵菹羸醢兩邊栗脯三醺攝酒如再醺加俎齊之皆如初齊肺卒醺取邊脯以降如初醺辭曰旨酒既

清嘉薦嘗時始加元服兄弟具來孝友時格永乃保之  
再醮曰旨酒既湑嘉薦伊脯乃申爾服禮儀有序祭此  
嘉爵承天之祐三醮曰旨酒令芳籩豆有楚咸加爾服  
肴升折俎承天之慶受福無疆

右醮

賓降直西序東面

主人降復初位冠者立于西階東南面賓字之冠者對  
字辭曰禮儀既備令月吉日昭告爾字爰字孔嘉髦士  
攸宜宜之于假永受保之曰伯某甫仲叔季唯其所當  
右字  
賓出主人送于廟門外請醴賓賓禮辭許賓就

次乃醴賓以壹獻之禮主人酬賓束帛儷皮贊者皆與

贊冠者為介賓出主人送于外門外再拜歸賓俎

右醴賓

冠者見於兄弟兄弟再拜冠者答拜見贊者西面拜

亦如之入見姑姊如見母乃易服服玄冠玄端爵韠奠

摯見於君遂以摯見於鄉大夫鄉先生

右見兄弟姑姊君鄉大夫鄉先

生

若孤子則父兄戒宿冠之日主人紒而迎賓拜揖

讓立于序端皆如冠主禮於阼凡拜北面于阼階上賓

亦北面于西階上答拜若殺則舉鼎陳于門外直東塾

北面

右孤子冠

若庶子則冠于房外南面遂醮焉

右庶子冠記

冠義始冠緇布之冠也太古冠布齊則緇之其緇也孔子曰吾未之聞也冠而敝之可也適子冠於阼以著代也醮於客位加有成也三加彌尊諭其志也冠而字之敬其名也委貌周道也章甫殷道也毋追夏后氏之道也周弁殷冐夏收三王共皮弁素積無大夫冠禮而有其昏禮古者五十而后爵何大夫冠禮之有公侯之有冠禮也夏之末造也天子之元子猶士也天下無生而貴者也繼世以立諸侯象賢也以官爵人德之殺也死而謚今也古者生無爵死無謚○郊特牲同禮記男女異長男子二十冠而字女子許嫁笄而字○曲禮男幼名冠字五十以伯仲死謚周道也○檀弓始冠緇布冠自諸侯下達冠而敝之可也玄冠朱組纓天子之冠也緇布冠纓緋諸侯之冠也玄冠丹組纓諸侯之齊冠也玄冠綦組纓士之齊冠也緇冠玄武子姓之冠也緇

冠素純既祥之冠也垂綫五寸惰游之士也玄冠縞武不齒之服也居冠屬武自天子下達有事然後綫。玉藻冠者雖三年之喪可也既冠於次入哭踊三者三乃出大功之末可以冠子可以嫁子可以取婦已雖小功既卒哭可以冠取妻下殤之小功則不可。雜記

大戴禮記公符自為主迎賓揖升自阼立于席既醴降自阼其餘自為主者其降也自西階以異其餘皆公同也公玄端以皮弁皆韞朝服素韞公冠加四玄冕饗之以三獻之禮無介無樂皆玄端其醕幣朱錦采四馬其

慶也天子儼焉太子與庶子其冠皆自為主其禮與士

同饗賓也皆同

○公符○注云四當為三玄當為衮字之誤

禮記

冠義

凡人之所以為人者禮義也禮義之始在於正

容體齊顏色順辭令容體正顏色齊辭令順而后禮義  
備以正君臣親父子和長幼君臣正父子親長幼和而  
后禮義立故冠而后服備服備而后容體正顏色齊辭  
令順故曰冠者禮之始也是故古者聖王重冠古者冠  
禮筮日筮賓所以敬冠事敬冠事所以重禮重禮所以



為國本也故冠於阼以著代也醮於客位三加彌尊加有成也已冠而字之成人之道也見於母母拜之見於兄弟兄弟拜之成人而與為禮也玄冠玄端奠摯於君遂以摯見於鄉大夫鄉先生以成人見也成人之者將責成人禮焉也責成人禮焉者將責為人子為人弟為人臣為人少者之禮行焉將責四者之行於人其禮可不重與故孝弟忠順之行立而后可以為人可以為人而后可以治人也故聖王重禮故曰冠者禮之始也嘉

事之重者也是故古者重冠重冠故行之於廟行之於廟者所以尊重事尊重事而不敢擅重事不敢擅重事所以自卑而尊先祖也

昏禮

儀禮昏禮下達納采用鴈主人筵于戶西西上右几使者玄端至擯者出請事入告主人如賓服迎于門外再拜賓不答拜揖入至于廟門揖入三揖至于階三讓主人以賓升西面賓升西階當阿東面致命主人阼階上

北面再拜授于楹間南面賓降出主人降授老鴈擯者

出請賓執鴈請問名主人許賓入授如初禮

記士昏禮凡行事必

用昏昕受諸禰廟辭無不腆無辱摯不用死  
吾子有惠貺室某也某有先人之禮使某也請納采對  
曰某之子蠢愚又弗能教吾子命之某不敢辭致命曰  
敢納采問名曰某既受命將加諸卜敢請女為誰氏對  
曰吾子有命且以備數而擇之某不敢辭問名主人  
受鴈還西面對賓受命乃降宗子無父母命之親皆  
沒已躬命之支子則稱其宗弟則稱其兄右納采問名  
禮記男女非有行媒不相知名非受幣不交不親故  
日月以告君齊戒以告鬼神為酒食以召鄉黨僚友以  
厚其別也取妻不取同姓故買妾不知其姓則卜之  
納女於天子曰備百姓於國君曰  
備酒漿於大夫曰備埽灑○曲禮

擯者出請賓告

事畢入告出請醴賓賓禮辭許主人徹几改筵東上側  
尊醴于房中主人迎賓于廟門外揖讓如初升主人  
北面再拜賓西階上北面答拜主人拂几授校拜送賓  
以几辟北面設于坐左之西階上答拜贊者酌醴加角  
柶面葉出于房主人受醴面枋筵前西北面賓拜受醴  
復位主人阼階上拜送贊者薦脯醢賓即筵坐左執觶  
祭脯醢以柶祭醴三西階上北面坐啐醴建柶興坐奠  
觶遂拜主人答拜賓即筵奠于薦左降筵北面坐取脯

主人辭賓降授人脯出主人送于門外再拜

記祭醴始扱一祭

又扱再祭賓右取脯左奉之乃歸執以反命凡使者歸反命曰某既得將事矣敢以禮告主人曰聞命矣醴曰子為事故至于某之室某有先人之禮請醴從者對曰某既得將事矣敢辭先人之禮敢固以請某辭不得命敢不從也右醴賓

納吉用鴈如納采禮

納吉曰吾子有

曰吉使某也敢告對曰某之子不教唯恐弗堪子有吉我與在某不敢辭右納吉

納徵玄纁

束帛儷皮如納吉禮

記皮帛必可制內文兼執足左首隨入西上參分

納徵執皮攝之

庭一在南賓致命釋外足見文主人受幣士受皮者自東出于後自左受遂坐攝皮逆退適東壁納徵曰吾子有嘉命貺室某也某有先人之禮儷皮束帛使某也請納徵致命曰某敢納徵對曰吾子順先典貺某重禮

某不敢辭敢不承命 女子許嫁笄而醴之稱字祖廟未毀教于公宮三月若祖廟已毀則教于宗室右納徵

禮記納幣一束束五兩兩五尋 女雖未許嫁年二十笄而禮之婦人執其禮燕則鬋首○雜記 請

期用鴈主人辭賓許告期如納徵禮 記請期曰吾子有賜命某既申受命

矣惟是三族之不虞使某也請吉日對曰某既前受命矣唯命是聽曰某命某聽命于吾子對曰某固唯命是聽使者曰某使某受命吾子不許某敢不告期曰某日對曰某敢不敬 須右請期 期初昏陳

三鼎于寢門外東方北面上其實特豚合升去蹄舉肺脊二祭肺二魚十有四腊一肫髀不升皆飪設局鼐設洗于阼階東南饌于房中醯醬二豆菹醢四豆兼巾

之黍稷四敦皆蓋大羹湑在饗尊于室中北墉下有禁  
玄酒在西綌罍加勺皆南枋尊于房戶之東無玄酒篚  
在南實四爵合卺

記腊必用鮮魚  
用鮒必穀全

主人爵弁纁裳緇

施從者畢玄端乘墨車從車二乘執燭前馬婦車亦如  
之有袂至于門外主人筵于戶西西上右几女次純衣  
纁袷立于房中南面姆纁笄宵衣在其右女從者畢袵  
玄纁笄被纁黼在其後主人玄端迎于門外西面再拜  
賓東面答拜主人揖入賓執鴈從至于廟門揖入三揖

至于階三讓主人升西面賓升北面奠鴈再拜稽首降  
出婦從降自西階主人不降送壻御婦車授綏姆辭不  
受婦乘以几姆加景乃驅御者代壻乘其車先俟于門

外記父醮子命之辭曰往迎爾相承我宗事勗帥以敬先妣之嗣若則有常子曰諾唯恐弗堪不敢忘命賓至擯者請對曰吾子命某以茲初昏使某將請承命對曰某固敬具以須父醮女而俟迎者母南面于房外  
女出于母左父西面戒之必有正焉若衣若笄母戒諸  
西階上不降父送女命之曰戒之敬之夙夜無違命  
母施衿結帨曰勉之敬之夙夜無違宮事庶母及門內  
施鞶申之以父母之命命之曰敬恭聽宗爾父母之言  
夙夜無愆視諸衿鞶婦乘以几  
從者二人坐持几相對右親迎

婦至主人揖婦以



入及寢門揖入升自西階媵布席于奧夫入于室即席  
婦尊西南面媵御沃盥交贊者徹尊罍舉者盥出除鼎  
舉鼎入陳于阼階南西面北上七俎從設北面載執而  
俟七者逆退復位于門東北面西上贊者設醬于席前  
菹醢在其北俎入設于豆東魚次腊特于俎北贊設黍  
于醬東稷在其東設醕于醬南設對醬于東菹醢在其  
南北上設黍于腊北其西稷設醕于醬北御布對席贊  
啓會卻于敦南對敦于北贊告具揖婦即對筵皆坐皆

祭薦黍稷肺贊爾黍授肺脊皆食以湆醬皆祭舉食  
舉也三飯卒食贊洗爵酌醕主人主人拜受贊戶內北  
面答拜醕婦亦如之皆祭贊以肝從皆振祭齎肝皆實  
于菹豆卒爵皆拜贊答拜受爵再醕如初無從三醕用  
盞亦如之贊洗爵酌于戶外尊入戶西北面奠爵拜皆  
答拜坐祭卒爵拜皆答拜興記婦入寢門贊者徹尊罍  
酌玄酒三屬于尊棄餘水  
于堂下階間  
加勺右即席主人出婦復位乃徹于房中如設于室  
尊否主人說服于房媵受婦說服于室御受姆授巾御

衽于奧媵衽良席在東皆有枕北止主人入親說婦之

纓燭出媵餽主人之餘御餽婦餘贊酌外尊醕之媵侍

于戶外呼則聞

禮右成

夙興婦沐浴纚笄宵衣以俟見

質明贊見婦于舅姑席于阼舅即席席于房外南面姑

即席婦執笄棗栗自門入升自西階進拜奠于席舅坐

撫之興答拜婦還又拜降階受笄服脩升進北面拜奠

于席姑坐舉以興拜授人

記笄緇被纁裏加于橋舅答拜宰徹笄右見舅姑禮

記婦見舅姑兄弟姊妹皆立于堂下西面北上見已見諸父各就其寢○雜記婦人之摯棋榛脯脩棗

栗○ 贊醴婦席于戶牖間側尊甒醴于房中婦疑立  
曲禮

于席西贊者酌醴加柶面枋出房席前北面婦東面拜  
受贊西階上北面拜送婦又拜薦脯醢婦升席左執解  
右祭脯醢以柶祭醴三降席東面坐啐醴建柶興拜贊  
答拜婦又拜奠于薦東北面坐取脯降出授人于門外

記婦席薦饌于  
房右贊醴婦

舅姑入于室婦盥饋特豚合升側載

無魚腊無稷並南上其他如取女禮婦贊成祭率食一  
醢無從席于北墉下婦徹設席前如初西上婦餽舅辭

易醬婦餽姑之饌御贊祭豆黍肺舉肺脊乃食率姑醕

之婦拜受姑拜送坐祭率爵姑受奠之婦徹于房中媵

御餽姑醕之雖無娣媵先于是與始飯之錯

右饋舅姑

舅

姑共饗婦以一獻之禮舅洗于南洗姑洗于北洗奠酬

舅姑先降自西階婦降自阼階歸婦俎于婦氏人

記饗婦姑

薦焉婦洗在北堂直室東隅篚在東北面盥婦酢舅更

爵自薦不敢辭洗舅降則辟于房不敢拜洗凡婦人相

饗無降庶婦則使人

舅饗送者以一獻之禮酬以

束錦姑饗婦人送者酬以束錦若異邦則贈丈夫送者

以束錦壻饗婦送者丈夫婦人如舅姑饗禮

右饗送者記婦入三

月然後祭行右祭行

若舅姑既沒則婦入三月乃奠菜席于廟

與東面右几席于北方南面祝盥婦盥于門外婦執筭

菜祝帥婦以入祝告稱婦之姓曰某氏來婦敢奠嘉菜

于皇舅某子婦拜扱地坐奠菜于几東席上還又拜如

初婦降堂取筭菜入祝曰某氏來婦敢告于皇姑某氏

奠菜于席如初禮婦出祝闔牖戶老醴婦于房中南面

如舅姑醴婦之禮

右廟見記若不親迎則婦入三月然後壻見曰某以得為外昏姻請覲

主人對曰某以得為外昏姻之數某之子未得濯漑于祭祀是以未敢見今吾子辱請吾子之就宮某將走見對曰某以非他故不足以辱命請終賜見對曰某以得為昏姻之故不敢固辭敢不從主人出門左西面壻入門東面奠摯再拜出擯者以摯出請受壻禮辭許受摯入主人再拜受壻再拜送出見主婦主婦闔扉立于其內壻立于門外東面主婦一拜壻答再拜主婦又拜壻出主人請醴及揖讓入醴以一獻之禮主婦薦奠酬無幣壻出主人送再拜右不親迎壻見禮記賀取妻者曰某子使某聞子有客使某羞天子有后有夫人有世婦有嬪有妻有妾公侯有夫人有世婦有妻有妾天子之妃曰后諸侯曰夫人大夫曰孺人士曰婦人庶人曰妻夫人自稱於天子曰老婦自稱於諸侯曰寡小君自稱於其君曰小童自世婦以下自稱曰婢子○

禮曲

禮記

昏義

昏禮者將合二姓之好上以事宗廟而下以繼

後世也故君子重之是以昏禮納采問名納吉納徵請期皆主人筵几于廟而拜迎于門外入揖讓而升聽命于廟所以敬慎重正昏禮也父親醮子而命之迎男先于女也子承命以迎主人筵几于廟而拜迎于門外壻執鴈入揖讓升堂再拜奠鴈蓋親受之于父母也降出御婦車而壻授綏御輪三周先俟于門外婦至壻揖婦以入共牢而食合鬯而醕所以合體同尊卑以親之也



敬慎重正而后親之禮之大體而所以成男女之別而立夫婦之義也男女有別而后夫婦有義夫婦有義而后父子有親父子有親而后君臣有正故曰昏禮者禮之本也夫禮始于冠本于昏重于喪祭尊于朝聘和于射鄉此禮之大體也夙興婦沐浴以俟見質明贊見婦於舅姑婦執笄棗栗段脩以見贊醴婦祭脯醢祭醴成婦禮也舅姑入室婦以特豚饋明婦順也厥明舅姑共饗婦以一獻之禮奠酬舅姑先降自西階婦降自阼

階以著代也成婦禮明婦順又申之以著代所以重責婦順焉也婦順者順于舅姑和于室人而后當于夫以成絲麻布帛之事以審守委積蓋藏是故婦順備而后內和理內和理而后家可長久也故聖王重之是以古者婦人先嫁三月祖廟未毀教于公宮祖廟既毀教于宗室教以婦德婦言婦容婦功教成祭之牲用魚芼之以蘋藻所以成婦順也古者天子后立六宮三夫人九嬪二十七世婦八十一御妻以聽天下之內治以明章

婦順故天下內和而家理天子立六官三公九卿二十七大夫八十一元士以聽天下之外治以明章天下之男教故外和而國治故曰天子聽男教后聽女順天子理陽道后治陰德天子聽外治后聽內職教順成俗外內和順國家理治此之謂盛德是故男教不修陽事不得適見于天日為之食婦順不修陰事不得適見于天月為之食是故日食則天子素服而修六官之職蕩天下之陽事月食則后素服而修六宮之職蕩天下之陰

事故天子之與后猶日之與月陰之與陽相須而后成者也天子修男教父道也后修女順母道也故曰天子之與后猶父之與母也故為天王服斬衰服父之義也為后服齊衰服母之義也 天地合而后萬物興焉夫昏禮萬世之始也取於異姓所以附遠厚別也幣必誠辭無不腆告之以直信信事人也信婦德也壹與之齊終身不改故夫死不嫁男子親迎男先於女剛柔之義也天先乎地君先乎臣其義一也執摯以相見敬章別

也男女有別然後父子親父子親然後義生義生然後禮作禮作然後萬物安無別無義禽獸之道也壻親御授綏親之也親之也者親之也敬而親之先王之所以得天下也出乎大門而先男帥女女從男夫婦之義由此始也婦人從人者也幼從父兄嫁從夫夫死從子夫也者夫也夫也者以知帥人者也玄冕齊戒鬼神陰陽也將以為社稷主為先祖後而可以不致敬乎其牢而食同尊卑也故婦人無爵從夫之爵坐以夫之齒器用

陶匏尚禮然也三王作牢用陶匏厥明婦盥饋舅姑奉食婦餽餘私之也舅姑降自西階婦降自阼階授之室也昏禮不用樂幽陰之義也樂陽氣也昏禮不賀人之

序也

○郊特牲

諸侯出夫人夫人比至于其國以夫人之

禮行至以夫人入使者將命曰寡君不敏不能從而事

社稷宗廟使使臣某敢告於執事主人對曰寡君固前

辭不教矣寡君敢不敬湏以俟命有司官陳器皿主人

有司亦官受之妻出夫使人致之曰某不敏不能從

而共粢盛使某也敢告于侍者主人對曰某之子不肖不敢辟誅敢不敬須以俟命使者退主人拜送之如舅在則稱舅舅沒則稱兄無兄則稱夫主人之辭曰某之子不肖如姑姊妹亦皆稱之

○雜記

### 相見禮

儀禮士相見之禮贄冬用雉夏用脬左頭奉之曰某也願見無由達某子以命命某見主人對曰某子命某見吾子有辱請吾子之就家也某將走見賓對曰某不足

以辱命請終賜見主人對曰某不敢為儀固請吾子之就家也某將走見賓對曰某不敢為儀固以請主人對曰某也固辭不得命將走見聞吾子稱贄敢辭贄賓對曰某不以贄不敢見主人對曰某不足以習禮敢固辭賓對曰某也不依於贄不敢見固以請主人對曰某也固辭不得命敢不敬從出迎于門外再拜賓答再拜主人揖入門右賓奉贄入門左主人再拜受賓再拜送贄出主人請見賓反見退主人送于門外再拜主人復



見之以其贄曰鄉者吾子辱使某見請還贄于將命者  
主人對曰某也既得見矣敢辭賓對曰某也非敢求見  
請還贄于將命者主人對曰某也既得見矣敢固辭賓  
對曰某不敢以聞固以請于將命者主人對曰某也固  
辭不得命敢不從賓奉贄入主人再拜受賓再拜送贄

出主人送于門外再拜

禮記聞始見君子者辭曰某固願聞名于將命者不得階主適

者曰某固願見罕見曰聞名亟見曰朝夕瞽曰聞名始入而辭曰辭矣即席曰可矣排闥說屨于戶內者一人而已矣有尊長在則否○少儀凡與客入者每門讓于客客至于寢門則主人請入為席然後出迎客客

固辭主人肅客而入主人入門而右客入門而左主人就東階客就西階客若降等則就主人之階主人固辭然後客復就西階主人與客讓登主人先登客從之拾級聚足連步以上上於東階則先右足上于西階則先左足若非飲食之客則布席席間函丈主人跪正席客跪撫席而辭客徹重席主人固辭客踐席乃坐主人不問客不先舉將即席容毋作兩手

振衣去齊尺衣毋撥足毋蹶○曲禮

士見于大夫終

辭其贊于其入也一拜其辱也賓退送再拜若常為

臣者則禮辭其贊曰某也辭不得命不敢固辭賓入奠贊再拜主人答壹拜賓出使擯者還其贊于門外曰某也使某還贊賓對曰某也既得見矣敢辭擯者對曰某

也命某某非敢為儀也敢以請賓對曰某也夫子之賤私不足以踐禮敢固辭擯者對曰某也使某不敢為儀也固以請賓對曰某固辭不得命敢不從再拜受

禮記士於

大夫不敢拜迎而拜送士於尊者先拜進面答之拜則走。玉藻

下大夫相見以鴈

飾之以布維之以索如執雉上大夫相見以羔飾之以布四維之結于面左頭如麇執之如士相見之禮

禮記凡執

天子鬯諸侯圭卿羔大夫鴈士雉庶人之摯匹童子委贄而退野外軍中無摯以纓拾矢可也。曲禮

始見于君執贄至下容彌蹙庶人見于君不為容進退

走士大夫則奠贄再拜稽首君答壹拜若他邦之人則使擯者還其贄曰寡君使某還贄賓對曰君不有其外

臣臣不敢辭再拜稽首受

禮記大夫士見於國君若勞之則還辟再拜稽首若

迎拜則還辟不敢答拜大夫士相見雖貴賤不敵主人敬客則先拜客客敬主人則先拜主人凡非弔喪非見國君無不答拜者大夫見於國君國君拜其辱士見於大夫大夫拜其辱同國始相見主人拜其辱君於士不答拜也非其臣則答拜之大夫於其臣雖賤必答拜之男女相答拜也○曲禮凡君召以三節二節以走一節以趨在官不俟履

在外不俟車○玉藻

凡燕見于君必辯君之南面若

不得則正方不疑君君在堂升見無方階辯君所在凡

言非對也。要而後傳言與君言，言使臣與大人言，言事

君與老者言，言使弟子與幼者言，言孝弟于父兄與衆

言，言忠信慈祥與居官者言，言忠信。凡與大人言，始視

面，中視，抱卒視，面毋改。衆皆若是。若父則遊目，毋上于

面，毋下于帶。若不言，立則視足，坐則視膝。

禮記凡侍於君紳垂足如

履齊頤雷垂拱視下而聽上視帶以及袷聽鄉任左○玉藻

凡侍坐于君子，君子

欠伸，問日之早晏，以食具告。改居則請退可也。夜侍坐

問夜膳，輦請退可也。

禮記侍坐於君子，君子欠伸，運笏澤劍首還履，問日之蚤莫，雖請退

可也。○少儀侍坐於君子，君子欠伸，撰杖履，視日蚤莫，侍坐者請出矣。○曲禮

若君賜之

食，則君祭先飯，徧嘗膳飲而俟君命之食，然後食。若有將食者，則俟君之食，然後食。若君賜之爵，則下席再拜稽首受爵，升席祭卒爵而俟君卒爵，然後授虛爵退坐。取屨隱辟，而后屨君為之興，則曰：「君無為興，臣不敢辭。」君若降送之，則不敢顧辭，遂出。大夫則辭退下，比及門三辭。禮記侍坐，則必退席，不退則必引而去。君之黨登席，不由前，為蹠席，徒坐不盡席。尺讀書食，則齊豆去席。尺若賜之食，而君客之，則命之祭，然後祭。先飯辨嘗羞飲而俟。若有嘗羞者，則俟君之食，然後食飯飲而

俟君命之羞羞近者命之品嘗之然後唯所欲凡嘗遠  
食必順近食君未覆手不敢殮君既食又飯殮飯殮者  
三飯也君既徹執飯與醬乃出授從者君若賜之爵  
則越席再拜稽首受登席祭之飲卒爵而俟君卒爵然  
後授虛爵君子之飲酒也受一爵而色洒如也二爵而  
言言斯禮已三爵而油油以退退則坐取屨隱辟而后  
屨坐左納右坐右納左凡尊必尚玄酒唯君面尊唯  
饗野人皆酒大夫側尊用於士側尊用禁○玉藻

若先生異爵者請見之則辭辭不得命則曰某無以見  
辭不得命將走見先見之非以君命使則不稱寡大

夫士則曰寡君之老凡自稱于君士大夫則曰下臣  
宅者在邦則曰市井之臣在野則曰草茅之臣庶人則

曰刺草之臣他國之人則曰外臣

禮記諸侯使人使於諸侯使者自稱曰寡

君之老

列國之大夫入天子之國曰某士自稱曰倍

臣某於外曰子於其國曰寡君之老使者自稱曰某○

曲禮

上大夫曰下臣擯者曰寡君之老下大夫自名

擯者曰寡大夫世子自名擯者曰寡君之適公子曰臣

孽士曰傳遽之臣於大夫曰外私大夫私事使私人擯

則稱名公士擯則曰寡大夫寡君之老大夫有所往必

與公士為賓

也○玉藻

凡執幣者不趨容彌虔以為儀執玉者

則唯舒武舉前曳踵

禮記凡奉者當心提者當帶執天子之器則上衡國君則平衡大夫

則綏之士則提之凡執主器執輕如不克執主器操幣

圭璧則尚左手行不舉足車輪曳踵立則磬折垂佩主

佩倚則臣佩垂圭佩垂則臣佩委執玉

其有藉者則裼無藉者則襲○曲禮



# 鄉飲酒禮

儀禮鄉飲酒之禮主人就先生而謀賓介主人戒賓賓拜辱主人答拜乃請賓賓禮辭許主人再拜賓答拜主

人退賓拜辱介亦如之

記鄉朝服而謀賓介皆使能不宿戒右戒賓介

乃席

賓主人介衆賓之席皆不屬焉尊兩壺于房戶間斯禁有玄酒在西設篚于禁南東肆加二勺于兩壺設洗于阼階東南南北以堂深東西當東榮水在洗東篚在洗

西南肆

記蒲筵緇布純尊綌幕賓至徹之其牲狗也亨于堂東北獻用爵其他用觶薦脯五挺橫祭于

其上的出自左房組由東壁自西階升賓組脊脅肩肺主人組脊脅臂肺介組脊脅胳膊肺肺皆離皆右體進膝右設席陳器饌

羹定主人速賓賓拜辱主人答拜還賓拜辱

介亦如之賓及衆賓皆從之主人一相迎于門外再拜賓賓答拜拜介介答拜揖衆賓主人揖先入賓厭介入門左介厭衆賓入衆賓皆入門左北上主人與賓三揖至于階三讓主人升賓升主人阼階上當楣北面再拜賓西階上當楣北面答拜主人坐取爵于篚降洗賓降主人坐奠爵于階前辭賓對主人坐取爵興適洗南面

坐奠爵于篚下盥洗賓進東北面辭洗主人坐奠爵于  
篚興對賓復位當西序東面主人坐取爵沃洗者西北  
面卒洗主人壹揖壹讓升賓拜洗主人坐奠爵遂拜降  
盥賓降主人辭賓對復位當西序卒盥揖讓升賓西階  
上疑立主人坐取爵賓之賓之席前西北面獻賓賓西  
階上拜主人少退賓進受爵以復位主人阼階上拜送  
爵賓少退薦脯醢賓升席自西方乃設折俎主人阼階  
東疑立賓坐左執爵祭脯醢奠爵于薦西興右手取肺

卻左手執本坐弗繚右絕末以祭尚左手齊之興加于  
俎坐挽手遂祭酒興席末坐啐酒降席坐奠爵拜告旨  
執爵興主人阼階上答拜賓西階上北面坐率爵興坐  
奠爵遂拜執爵興主人阼階上答拜

右主人  
獻賓

賓降洗

主人降賓坐奠爵興辭主人對賓坐取爵適洗南北面  
主人阼階東南面辭洗賓坐奠爵于篚興對主人復阼  
階東西面賓東北面盥坐取爵率洗揖讓如初升主人  
拜洗賓答拜興降盥如主人禮賓實爵主人之席前東

南面酢主人主人阼階上拜賓少退主人進受爵復位  
賓西階上拜送爵薦脯醢主人升席自北方設折俎祭  
如賓禮不告旨自席前適阼階上北面坐卒爵興坐奠  
爵遂拜執爵興賓西階上答拜主人坐奠爵于序端阼  
階上北面再拜崇酒賓西階上答拜

右賓酢主人

主人坐

取觶于篚降洗賓降主人辭降賓不辭洗立當西序東  
面卒洗揖讓升賓西階上疑主人實觶酬賓阼階上北  
面坐奠觶遂拜執觶興賓西階上答拜坐祭遂飲卒觶

興坐奠觶遂拜執觶興賓西階上答拜主人降洗賓降  
辭如獻禮升不拜洗賓西階上立主人實觶賓之席前  
北面賓西階上拜主人少退率拜進坐奠觶于薦西賓  
辭坐取觶復位主人阼階上拜送賓北面坐奠觶于薦  
東復位主人揖降賓降立于階西當序東面

記以爵拜者不徒作

凡奠者于左將舉于右凡舉爵三作而不徒爵右主人酬賓

主人以介揖讓升

拜如賓禮主人坐取爵于東序端降洗介降主人辭降  
介辭洗如賓禮升不拜洗介西階上立主人實爵介之

席前西南面獻介介西階上北面拜主人少退介進北面受爵復位主人介右北面拜送爵介少退主人立于西階東薦脯醢介升席自北方設折俎祭如賓禮不齊肺不啐酒不告旨自南方降席北面坐卒爵興坐奠爵遂拜執爵興主人介右答拜

右主人獻介

介降洗主人復

阼階降辭如初卒洗主人盥介揖讓升授主人爵于兩楹之間介西階上立主人實爵酢于西階上介右坐奠爵遂拜執爵興介答拜主人坐祭遂飲卒爵興坐奠爵

遂拜執爵興介答拜主人坐奠爵于西楹南介右再拜

崇酒介答拜主人復阼階揖降介降立于賓南

記主人介凡升

席自北方降自南方右介酢主人

主人西南面三拜衆賓衆賓皆答

壹拜主人揖升坐取爵于西楹下降洗升實爵于西階

上獻衆賓衆賓之長升拜受者三人主人拜送坐祭立

飲不拜既爵授主人爵降復位衆賓獻則不拜受爵坐

祭立飲每一人獻則薦諸其席衆賓辯有脯醢主人以

爵降奠于篚

記衆賓之長一人辭洗如賓禮立者東面北上若有北面者則東上樂正與立者皆



薦以齒 坐卒爵者拜既爵立卒爵者不拜既爵右主人獻衆賓

揖讓升賓厭介升

介厭衆賓升衆賓序升即席一人洗升舉觶于賓實觶西階上坐奠觶遂拜執觶興賓席末答拜坐祭遂飲卒觶興坐奠觶遂拜執觶興賓答拜降洗升實觶立于西階上賓拜進坐奠觶于薦西賓辭坐受以興舉觶者西階上拜送賓坐奠觶于其所舉觶者降

右一人舉觶為旅酬始

賓若有尊者諸公大夫則既一人舉觶乃入席于賓東公三重大夫再重公如大夫入主人降賓介降衆賓皆

降復初位主人迎揖讓升公升如賓禮辭一席使一人

去之大夫則如介禮有諸公則辭加席委于席端主人

不徹無諸公則大夫辭加席主人對不去加席

記樂作大夫不

入若有諸公則大夫於主人之北西面右獻遵爵居左其飲居右介爵酢爵俛爵皆居右。

少儀禮記客

設席于堂廉東上工四人二瑟瑟先相者二人皆左

何瑟瑟後首掩越內弦右手相樂正先升立于西階東工

入升自西階北面坐相者東面坐送授瑟乃降工歌鹿

鳴四牡皇皇者華卒歌主人獻工工左瑟一人拜不興

受爵主人阼階上拜送爵薦脯醢使人相祭工飲不拜  
既爵授主人爵衆工則不拜受爵祭飲辯有脯醢不祭  
大師則為之洗賓介降主人辭降工不辭洗笙入堂下  
磬南北面立樂南陔白華華黍主人獻之于西階上一  
人拜盡階不升堂受爵主人拜送爵階前坐祭立飲不  
拜既爵升授主人爵衆笙則不拜受爵坐祭立飲辯有  
脯醢不祭乃間歌魚麗笙由庚歌南有嘉魚笙崇丘歌  
南山有臺笙由儀乃合樂周南關雎葛覃卷耳召南鵲

巢采繁采蘋工告于樂正曰正歌備樂正告于賓乃降

記獻工與笙取爵于上篚既獻奠于下篚其笙則獻諸西階上磬階間縮霤北面鼓之右樂賓

主人

降席自南方側降作相為司正司正禮辭許諾主人拜

司正答拜主人升復席司正洗解升自西階阼階上北

面受命于主人主人曰請安于賓司正告于賓賓禮辭

許司正告于主人主人阼階上再拜賓西階上答拜司

正立于楹間以相拜皆揖復席司正實解降自西階階

間北面坐奠解退共少立坐取解不祭遂飲卒解興坐

奠觶遂拜執觶興洗北面坐奠觶于其所退立于觶南  
記司正既舉觶而薦諸其位右立司正賓北面坐取俎西之觶阼階上

北面酬主人主人降席立于賓東賓坐奠觶遂拜執觶  
興主人答拜不祭立飲不拜卒觶不洗實觶東南面授  
主人主人阼階上拜賓少退主人受觶賓拜送于主人  
之西賓揖復席主人西階上酬介介降席自南方立于  
主人之西如賓酬主人之禮主人揖復席司正升相旅  
曰某子受酬受酬者降席司正退立于序東面受酬

者自介右衆受酬者受自左拜興飲皆如賓酬主人之

禮辯卒受者以觶降坐奠于篚司正降復位

記凡旅不洗不洗者

不祭既旅士不入右旅酬

使二人舉觶于賓介洗升實觶于西階

上皆坐奠觶遂拜執觶興賓介席末答拜皆坐祭遂飲

卒觶興坐奠觶遂拜執觶興賓介席末答拜逆降洗升

實觶皆立于西階上賓介皆拜皆進薦西奠之賓辭坐

取觶以興介則薦南奠之介坐受以興退皆拜送降賓

介奠于其所司正升自西階受命于主人主人曰請坐

于賓賓辭以俎主人請徹俎賓許司正降階前命弟子  
俟徹俎司正升立于席端賓降席北面主人降席阼階  
上北面介降席西階上北面遵者降席東南面賓取俎  
還授司正司正以降賓從之主人取俎還授弟子弟子  
以降自西階主人降自阼階介取俎還授弟子弟子以  
降介從之若有諸公大夫則使人受俎如賓禮衆賓皆  
降

記徹俎賓介遵者之俎受者以降遂  
出授從者主人之俎以東右徹俎

說屢揖讓如

初升坐乃羞無算爵無算樂賓出奏陔主人送于門外

再拜

記主人之贊者西面北上不與無算爵然後與樂正命奏陔賓出至于階陔作右爵樂無算

明日賓服鄉服以拜賜主人如賓服以拜辱主人釋服

乃息司正無介不殺薦脯醢羞唯所有徵唯所欲以告

于先生君子可也賓介不與鄉樂唯欲

右息司正

禮記

鄉飲酒義

鄉飲酒之義主人拜迎賓于庠門之外入三

揖而后至階三讓而后升所以致尊讓也盥洗揚觶所

以致絜也拜至拜洗拜受拜送拜既所以致敬也尊讓

絜敬也者君子之所以相接也君子尊讓則不爭絜敬



則不慢不慢不爭則遠於鬪辨矣不鬪辨則無暴亂之禍矣斯君子所以免於人禍也故聖人制之以道鄉人士君子尊于房戶之間賓主共之也尊有玄酒貴其質也羞出自東房主人共之也洗當東榮主人之所以自絜而以事實也賓主象天地也介僎象陰陽也三賓象三光也讓之三也象月之三日而成魄也四面之坐象四時也天地嚴凝之氣始于西南而盛于西北此天地之尊嚴氣也此天地之義氣也天地溫厚之氣始于東

北而盛于東南此天地之盛德氣也此天地之仁氣也  
主人者尊賓故坐賓于西北而坐介于西南以輔賓賓  
者接人以義者也故坐于西北主人者接人以仁以德  
厚者也故坐于東南而坐僎于東北以輔主人也仁義  
接賓主有事俎豆有數曰聖聖立而將之以敬曰禮禮  
以體長幼曰德德也者得于身也故曰古之學術道者  
將以得身也是故聖人務焉祭薦祭酒敬禮也嘑肺嘗  
禮也啐酒成禮也于席末言是席之正非專為飲食也

為行禮也此所以貴禮而賤財也卒解致賓于西階上言是席之上非專為飲食也此先禮而後財之義也先禮而後財則民作敬讓而不爭矣鄉飲酒之禮六十者坐五十者立侍以聽政役所以明尊長也六十者三豆七十者四豆八十者五豆九十者六豆所以明養老也民知尊長養老而后乃能入孝弟民入孝弟出尊長養老而后成教成教而后國可安也君子之所謂孝者非家至而日見之也合諸鄉射教之鄉飲酒之禮而孝

弟之行立矣 鄉飲酒之義立賓以象天立主以象地  
設介僎以象日月立三賓以象三光古之制禮也經之  
以天地紀之以日月參之以三光政教之本也烹狗于  
東方祖陽氣之發于東方也洗之在阼其水在洗東祖  
天地之左海也尊有玄酒教民不忘本也賓必南鄉東  
方者春春之為言蠢也產萬物者聖也南方者夏夏之  
為言假也養之長之假之仁也西方者秋秋之為言愁  
也愁之以時察守義者也北方者冬冬之為言中也中

者藏也是以天子之立也左聖鄉仁右義偕藏也介必東鄉介賓主也主人必居東方東方者春春之為言蠢也產萬物者也主人者造之產萬物者也月者三日則成魄三月則成時是以禮有三讓建國必立三卿三賓者政教之本禮之大參也

### 燕禮

儀禮燕禮小臣戒與者膳宰具官饌于寢東樂人縣設洗篚于阼階東南當東雷壘水在東篚在洗西南肆設

膳篚在其北西面司宮尊于東楹之西兩方壺左玄酒  
南上公尊瓦大兩有豐罍用綌若錫在尊南南上尊士  
旅食于門西兩園壺司宮筵賓于戶西東上無加席也  
射人告具

記燕朝服于寢其牲狗也  
亭于門外東方右陳設

小臣設公席于

阼階上西鄉設加席公升即位于席西鄉小臣納卿大  
夫卿大夫皆入門右北面東上士立于西方東面北上  
祝史立于門東北面東上小臣師一人在東堂下南面  
士旅食者立于門西東上公降立于阼階之東南南鄉

爾卿卿西面北上爾大夫大夫皆少進射人請賓公曰  
命某為賓射人命賓賓少進禮辭反命又命之賓再拜  
稽首許諾射人反命賓出立于門外東面公揖卿大夫  
乃升就席小臣自阼階下北面請執器者與羞膳者乃  
命執器者執器者升自西階立于尊南北面東上膳宰  
請羞于諸公卿者記與卿燕則大夫為賓與大夫燕亦  
大夫為賓羞膳者與執器者皆士也  
羞卿者小膳宰也凡薦與  
羞者小膳宰也右位次射人納賓賓入及庭公降  
一等揖之公升就席賓升自西階主人亦升自西階賓

又北面至再拜賓答再拜主人降洗洗南西北面賓降  
階西東面主人辭降賓對主人北面盥坐取觚洗賓少  
進辭洗主人坐奠觚于篚興對賓反位主人卒洗賓揖  
乃升主人升賓拜洗主人賓右奠觚答拜降盥賓降主  
人辭賓對卒盥賓揖升主人升坐取觚執罍者舉罍主  
人酌膳執罍者反罍主人筵前獻賓賓西階上拜筵前  
受爵反位主人賓右拜送爵膳宰薦脯醢賓升筵膳宰  
設折俎賓坐左執爵右祭脯醢奠爵于薦右興取肺坐



絕祭饗之興加于俎坐挽手執爵遂祭酒興席末坐啐  
酒降席坐奠爵拜告旨執爵興主人答拜賓西階上北  
面坐卒爵興坐奠爵遂拜主人答拜

右主人  
獻賓

賓以虛

爵降主人降賓洗南坐奠觚少進辭降主人東面對賓  
坐取觚奠于篚下盥洗主人辭洗賓坐奠觚于篚興對  
卒洗及階揖升主人升拜洗如賓禮賓降盥主人降賓  
辭降卒盥揖升酌膳執罍如初以酢主人于西階上主  
人北面拜受爵賓主人之左拜送爵主人坐祭不啐酒

不拜酒不告旨遂率爵興坐奠爵拜執爵興賓答拜主人不崇酒以虛爵降奠于篚賓降立于西階西射人升

賓賓升立于序西東面

記惟公與賓有組右賓酢主人

主人盥洗象

觚升賓之東北面獻于公公拜受爵主人降自西階阼階下北面拜送爵士薦脯醢膳宰設折俎升自西階公祭如賓禮膳宰贊授肺不拜酒立卒爵坐奠爵拜執爵興主人答拜升受爵以降奠于膳篚更爵洗升酌膳酒以降酢于阼階下北面坐奠爵再拜稽首公答再拜主人坐

祭遂卒爵再拜稽首公答再拜主人奠爵于篚

記獻公曰臣敢

奏爵以聽命右主人獻公及自酢

主人盥洗升媵觚于賓酌散西階

上坐奠爵拜賓賓降筵北面答拜主人坐祭遂飲賓辭

卒爵拜賓答拜主人降洗賓降主人辭降賓辭洗卒洗

揖升不拜洗主人酌膳賓西階上拜受爵于筵前反位

主人拜送爵賓升席坐祭酒遂奠于薦東主人降復位

賓降筵西東南面立

右主人酬賓

小臣自阼階下請媵爵

者公命長小臣作下大夫二人媵爵媵爵者阼階下皆

北面再拜稽首公答再拜媵爵者立于洗南西面北上  
序進盥洗角觶升自西階序進酌散交于楹北降阼階  
下皆奠觶再拜稽首執觶興公答再拜媵爵者皆坐祭  
遂卒觶興坐奠觶再拜稽首執觶興公答再拜媵爵者  
執觶待于洗南小臣請致者若君命皆致則序進奠觶  
于篚阼階下皆再拜稽首公答再拜媵爵者洗象觶升  
實之序進坐奠于薦南北上降阼階下皆再拜稽首送  
觶公答再拜公坐取大夫所媵觶興以酬賓賓降西階

下再拜稽首公命小臣辭賓升成拜公坐奠觶答再拜  
執觶興立卒觶賓下拜小臣辭賓升再拜稽首公坐奠  
觶答再拜執觶興賓進受虛爵降奠于篚易觶洗公有  
命則不易不洗反升酌膳觶下拜小臣辭賓升再拜稽  
首公答再拜賓以旅酬于西階上射人作大夫長升受  
旅賓大夫之右坐奠觶拜執觶興大夫答拜賓坐祭立  
飲卒觶不拜若膳觶也則降更觶洗升賓散大夫拜受  
賓拜送大夫辭受酬如受賓酬之禮不祭卒受者以虛

解降奠于筐

記凡公所酬既拜請旅侍臣凡公所辭皆栗階凡栗階不過二等右公為賓舉旅

主人洗升實散獻卿于西階上司宮兼卷重席設于

賓左東上卿升拜受觚主人拜送觚卿辭重席司宮徹

之乃薦脯醢卿升席坐左執爵右祭脯醢遂祭酒不啐

酒降席西階上北面坐卒爵興坐奠爵拜執爵興主人

答拜受爵卿降復位辯獻卿主人以虛爵降奠于筐射

人乃升卿卿皆升就席若有諸公則先卿獻之如獻卿

之禮席于阼階西北面東上無加席

右主人獻孤卿

小臣又

請媵爵者二大夫媵爵如初請致者若命長致則媵爵者奠觶于筐一人待于洗南長致致者阼階下再拜稽首公答再拜洗象觶升實之坐奠于薦南降與立于洗南者二人皆再拜稽首送觶公答再拜公又行一爵若賓若長唯公所酬以旅于西階上如初大夫卒受者以虛觶降奠于筐

右公為卿舉旅

主人洗升獻大夫于西階上

大夫升拜受觶主人拜送觶大夫坐祭立卒爵不拜既爵主人受爵大夫降復位胥薦主人于洗北西面脯醢

無胥辯獻大夫遂薦之繼賓以西東上率射人乃升大

夫大夫皆就席

右主人  
獻大夫

席工于西階上少東樂正先

升北面立于其西小臣納工工四人二瑟小臣左何瑟  
而鼓執越內弦右手相入升自西階北面東上坐小臣  
坐授瑟乃降工歌鹿鳴四牡皇皇者華率歌主人洗升  
獻工工不興左瑟一人拜受爵主人西階上拜送爵薦  
脯醢使人相祭率爵不拜主人受爵衆工不拜受爵坐  
祭遂率爵辯有脯醢不祭主人受爵降奠于篚公又舉



奠觶唯公所賜以旅于西階上如初率笙入立于縣中  
奏南陔白華華黍主人洗升獻笙于西階上一人拜盡  
階不升堂受爵降主人拜送爵階前坐祭立率爵不拜  
既爵升授主人衆笙不拜受爵降坐祭立率爵辯有脯  
醢不祭乃間歌魚麗笙由庚歌南有嘉魚笙崇丘歌南  
山有臺笙由儀遂歌鄉樂周南關雎葛覃卷耳召南鵲  
巢采芣采蘋大師告樂正曰正歌備樂正由楹內東楹  
之東告于公乃降復位

記若以樂納賓則賓及庭奏肆  
夏賓拜酒主人答拜而樂闋公

拜受爵而奏肆夏公卒爵主人升受爵以下而樂闋升歌鹿鳴下管新宮笙入三成遂合鄉樂若舞則勺右樂賓

射人自阼階下請立司正公許射人遂為司正司正洗角觶南面坐奠于中庭升東楹之東受命西階上北面命卿大夫公曰以我安卿大夫皆對曰諾敢不安司正降自西階南面坐取觶升酌散降南面坐奠觶右還北面少立坐取觶興坐不祭卒觶奠之興再拜稽首左還南面坐取觶洗南面反奠于其所升自西階東楹之東請徹俎降公許告于賓賓北面取俎以出膳宰徹公

俎降自左階以東卿大夫皆降東面北上賓反入及卿大夫皆說屨升就席公以賓及卿大夫皆坐乃安羞庶羞大夫祭薦司正升受命皆命君曰無不醉賓及卿大夫皆興對曰諾敢不醉皆反坐

記有內羞右立司正安燕

主人洗

升獻士于西階上士長升拜受觶主人拜送觶士坐祭立飲不拜既爵其他不拜坐祭立飲乃薦司正與射人一人司士一人執罍二人立于觶南東上辯獻士士既獻者立于東方西面北上乃薦士祝史小臣師亦就其

位而薦之主人就旅食之尊而獻之旅食不拜受爵坐

祭立飲

右主人獻士

若射則大射正為司射如鄉射之禮

記君與射則為下射袒朱襦樂作而后就物小臣以巾授矢稍屬不以樂志既發則小臣受弓以授弓人上射退于物一筭既發則答君而俟若飲君燕則夾爵君在大夫射則肉袒右燕射

賓降洗升媵

觚于公酌散下拜公降一等小臣辭賓升再拜稽首公

答再拜賓坐祭卒爵再拜稽首公答再拜賓降洗象解

升酌膳坐奠于薦南降拜小臣辭賓升成拜公答再拜

賓反位公坐取賓所媵觶興唯公所賜受者如初受酬

之禮降更爵洗升酌膳下拜小臣辭升成拜公答拜乃就席坐行之有執爵者唯受于公者拜司正命執爵者爵辭卒受者興以酬士大夫卒受者以爵興西階上酬士士升大夫奠爵拜士答拜大夫立卒爵不拜賓之士拜受大夫拜送士旅于西階上辯士旅酌卒

右公為士舉旅

主人洗升自西階獻庶子于阼階上如獻士之禮辯降洗遂獻左右正與內小臣皆于阼階上如獻庶子之禮

右主人獻庶子以下

無算爵士也有執膳爵者有執散爵者執

膳爵者酌以進公公不拜受執散爵者酌以之公命所賜所賜者興受爵降席下奠爵再拜稽首公答拜受賜爵者以爵就席坐公卒爵然後飲執膳爵者受公爵酌反奠之受賜爵者興授執散爵者乃酌行之唯受爵于公者拜卒受爵者興以酬士于西階上士升大夫不拜乃飲實爵士不拜受爵大夫就席士旅酌亦如之公有命徹罍則卿大夫皆降西階下北面東上再拜稽首公命小臣辭公答再拜大夫皆辟遂升反坐士終

旅於上如初無算樂宵則庶子執燭于阼階上司宮執燭于西階上甸人執大燭于庭閭人為大燭于門外賓醉北面坐取其薦脯以降奏陔賓所執脯以賜鐘人于門內霑遂出卿大夫皆出公不送

右無算爵賓出

禮記

燕義

諸侯燕禮之義君立阼階之東南南鄉爾卿大

夫皆少進定位也君席阼階之上居主位也君獨升立席上西面特立莫敢適之義也設賓主飲酒之禮也使宰夫為獻主臣莫敢與君亢禮也不以公卿為賓而以

大夫為賓為疑也明嫌之義也賓入中庭君降一等而揖之禮之也君舉旅于賓及君所賜爵皆降再拜稽首升成拜明臣禮也君答拜之禮無不答明君上之禮也臣下竭力盡能以立功于國君必報之以爵祿故臣下皆務竭力盡能以立功是以國安而君寧禮無不答言上之不虛取於下也上必明正道以道民民道之而有功然後取其什一故上用足而下不匱也是以上下和親而不相怨也和寧禮之用也此君臣上下之大義也



故曰燕禮者所以明君臣之義也。席小卿次上卿大夫次小卿士庶子以次就位于下。獻君君舉旅行酬而后獻卿卿舉旅行酬而后獻大夫大夫舉旅行酬而后獻士士舉旅行酬而后獻庶子俎豆牲體薦羞皆有等差所以明貴賤也。

繹史卷二十四之一